

Komunikado di Prensa

RvA ta mustra riba stipulashonnan den leinan ku no ta kuadra ku nos Konstitushon

WILLEMSTAD – Konseho di Konsulta di Kòrsou (Raad van Advies, RvA) a tuma nota di informenan den medionan di komunikashon kaminda ta elaborá riba un konseho adishonal ku RvA a saka 20 di febrüari 2019 pa Gobièrnu di Kòrsou pa bini ku un Kámara di Presupuesto (Begrotingskamer). Komo ku na algun okashon a saka e konseho mas ayá for di su konteksto, RvA ta haña nesesario pa pone un ke otro den su konteksto korekto.

For di 24 di ougùstùs 2016 RvA a formulá un konseho riba un proposishon di lei di Gobièrnu pa yega na un Kámara di Presupuesto. Den e proposishon ei den mas ku un artíkulo a preskribí ku Staten mester disidí ku aprobashon di un mayoria kalifiká, ke men por lo ménos dos terser parti di parlamento. Sinembargo, Konstitushon (Staatsregeling) di Kòrsou ta sali for di e punto di bista di un mayoria simpel; ke men mitar plùs 1. P’esei den e konseho di 24 di ougùstùs 2016 RvA a mustra Gobièrnu ku no ta posibel pa determiná e tomo di desishon a base di un mayoria kalifiká sin kambia Konstitushon. Ora Gobièrnu a entregá na Staten e konsepto di lei pa yega na un Kámara di Presupuesto dia 4 di desèmber 2018, a resultá ku Gobièrnu tòg no a kambia e artíkulonon en kestion.

Presedente

Aparentemente Gobièrnu no ta di akuerdo ku RvA riba e punto di tomo di desishon a base di un mayoria kalifiká. Den e splikashon di e proposishon di lei pa un Kámara di Presupuesto, Gobièrnu ta referí entre otro na artíkulo 29 di e Lei di integridat di (kandidato pa) minister, e asina yamá lei di screening, ku lo a sirbi komo presedente. E artíkulo aki ta stipulá ku e úniko manera pa Staten kambia e lei aki ta a base di un mayoria di por lo ménos dos terser parti di e kantidat di miembro (un mayoria kalifiká). Hustamente pa e motibu aki RvA den su konseho di 20 di febrüari último a atendé e artíkulo 29 di e lei di screening tambe i a konkluí ku di mes manera mester skrap e artíkulo aki. E tambe ta en pugna ku espíritu i idea di nos Konstitushon. Anke e palabranan ‘pa medio di vishon avansá’ posiblemente lo por krea e impreshon ku RvA ta bini bèk riba un opinion ku e tabatin durante tratamentu di un proposishon di lei di screening, esaki tòg no ta e kaso èt òl. Realisá ku e proposishon original di e lei di screening, riba kua RvA a konsehá kaba dia 6 di ougùstùs 2012, no tabata kontené niun stipulashon ku awor si ta poné den artíkulo 29 di lei di screening. Ta despues Gobièrnu di e tempu aya a agregá e stipulashon aki na e proposishon di lei di screening ku a bai Staten. Ku otro palabra, RvA nunca no a risibí ni wak e último vershon di e proposishon di lei aki te pa e duna su konseho.

Ku énfasis RvA ta mustra ku e konseho di 24 di ougùstùs i esun adishonal aki no tin niun sorto di konsekuensia pa aplikashon di e lei di screening.

Konseho pa Staten

RvA a hasi uso di su kompetensia ankrá den lei pa riba su propio iniciativa (sin ku a pidi’è) duna un konseho mas ayá riba e proposishon di lei pa e Kámara di Presupuesto. Den e konseho adishonal aki na Gobièrnu fechá 20 di febrüari último, RvA a bolbe mustra ku e stipulashonnan den e proposishon di lei, kaminda ta preskribí un tomo di desishon a base di un mayoria kalifiká, no ta kuadra ku espíritu i idea di Konstitushon di Kòrsou. Komo ku Staten ya a kuminsá trata e

proposishon di lei, RvA a rekomendá tantu Minister di Finansa komo Minister di Asuntunan General den su karta di 20 di febrüari último pa manda e konseho adishonal di e mesun fecha na Staten, di moda ku nan tambe por tuma nota di dje.

E konsehonan menshoná di e Konseho di Konsulta ta disponibel riba su website:

www.raadvanadvies.cw

Willemstad, 6 di mart 2019

Na nòmber di vise president di Konseho di Konsulta

Señora Mr. C.M. Raphaëla, Sekretario